



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

Broj:  
Sarajevo, \_\_. \_\_. 2022. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na \_\_. sjednici održanoj \_\_. \_\_. 2022. godine, primilo je k znanju

Informaciju o aktivnostima Grada Sarajeva iz oblasti saradnje sa zdravstvenim ustanovama i organizacijama porodične i dječije zaštite

**PREDSJEDAVAJUĆI GRADSKOG VIJEĆA**

**Jasmin Ademović**





**Grad Sarajevo**  
**City of Sarajevo**

**Bosna i Hercegovina**  
**Federacija Bosne i Hercegovine**  
**Kanton Sarajevo**  
**Grad Sarajevo**  
**GRADONAČELNICA**

**Informacija**  
**o realizaciji aktivnosti Grada Sarajeva iz oblasti saradnje sa zdravstvenim ustanovama i**  
**organizacijama porodične i dječije zaštite**

**Predlagač: Gradonačelnica**  
**Obrađivač: Služba za lokalno poslovanje**

**Sarajevo, novembar 2022. godine**

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 407 443  
**Fax:** +387 33 208 341  
**Email:** grad@sarajevo.ba  
**Web:** www.sarajevo.ba



**Informacija**  
**o realizaciji aktivnosti Grada Sarajeva iz oblasti saradnje sa zdravstvenim ustanovama i organizacijama porodične i dječije zaštite**

## **I Uvod**

Programom rada Gradskog vijeća Grada Sarajeva za 2022. godinu, broj: 01-GV-02-1776/21 od 29.12.2021. godine, Planom rada Grada Sarajeva za 2022. godinu, broj: 01-GV-02-573/22 od 04.04.2022. godine i Budžetom Grada Sarajeva („Službene novine Kantona Sarajevo“, broj 2/22), planirana je realizacija aktivnosti iz oblasti saradnje sa zdravstvenim ustanovama i organizacijama porodične i dječije zaštite.

U cilju informiranja Gradskog vijeća Grada Sarajeva, pripremljena je Informacija o aktivnostima Grada Sarajeva iz oblasti saradnje sa zdravstvenim ustanovama i organizacijama porodične i dječije zaštite.

## **II Realizacija sredstava iz Budžeta Grada Sarajeva za 2022. godinu i aktivnosti iz oblasti saradnje sa zdravstvenim ustanovama i organizacijama porodične i dječije zaštite**

### **Udruženje oboljelih od Morbus Crohna i ulceroznog kolitisa u BiH**

Ugovor o realizaciji sredstva u iznosu od 10.000,00 KM za Udruženje oboljelih od Morbus Crohna i ulceroznog kolitisa u BiH potpisan je 26.01.2022. godine. Ugovor su potpisale gradonačelnica Sarajeva Benjamina Karić i predsjednica Udruženja oboljelih od Morbus Crohna i ulceroznog kolitisa u BiH Alma Hadžić.

Udruženje se angažuje na poboljšanju zdravstvenog stanja, socijalnog i pravnog statusa pacijenata te direktnom savjetovanju i podršci oboljelim od Morbus Crohna i ulceroznog kolitisa.

### **Roditeljska kuća**

Na Međunarodni dan djece oboljele od raka, 15. februara 2022. godine, potpisan je ugovor o realizaciji sredstava iz Budžeta Grada Sarajeva za 2022. godinu za projekat Roditeljska kuća. Ugovor u iznosu od 20.000,00 KM potpisali su zamjenica gradonačelnice Sarajeva Anja Margetić i predsjednik Udruženja Srce za djecu oboljelu od raka Fikret Kubat.

Udruženje Srce za djecu oboljelu od raka od 2003. godine radi s djecom i omladinom oboljelom od raka.

Kako je liječenje u većini slučajeva dugotrajno i materijalno iscrpljujuće, u 2011. godini Udruženje je pokrenulo inicijativu prikupljanja sredstava za izgradnju Roditeljske kuće u krugu klinike na kojoj se mališani liječe – Hematoonkološkom odjeljenju Pedijatrijske klinike Jezero.

Kontinuiran boravak roditelja i bližih srodnika s bolesnim djetetom, u toplom, porodičnom okruženju, doprinosi bržem i sigurnijem izlječenju, kako psihičkom tako i fizičkom.

Ovim projektom obuhvaćena su oboljela djeca i njihovi roditelji koji dolaze iz Federacije Bosne i Hercegovine, a dugotrajno se liječe i borave na Hematoonkološkom odjeljenju. Sam proces liječenja, koji je izuzetno težak i kompliciran, traje do godinu dana, dok proces održavanja traje i do pet godina.

U aprilu 2016. godine Roditeljska kuća je i svečano otvorena, uz pomoć humanih ljudi i donatora iz cijelog svijeta. Kuća se sastoji od 10 apartmanskih jedinica, zajedničkog dnevnog boravka, kuhinje, multifunkcionalne sale, vešeraja, garaže i kancelarijskih prostorija Udruženja.

Iako je Roditeljska kuća izgrađena, otvorena uz prosječan kapacitet popunjenosti od 70% na šestogodišnjem nivou, uz prosjek boravka porodice i do 33 dana, još uvijek nema riješeno pitanje sistemskog finansiranja pa se većinom finansira iz jednokratnih grantova i donacija, te aktivnostima Udruženja.

Grad Sarajevo kontinuirano pruža finansijsku podršku Roditeljskoj kući.

Također, Odlukom o davanju saglasnosti za preusmjeravanje sredstava u Budžetu Grada Sarajeva (Službene novine Kantona Sarajevo, broj: 2/22) data je saglasnost gradonačelnici Grada Sarajeva za donošenje Odluke kojom će se sredstva koja su namijenjena za javni doček Nove 2022. godine godine preusmjeriti Udruženju "Srce za djecu oboljelu od raka", kao pomoć i podrška Grada Sarajeva djeci oboljeloj od raka i Udruženju "Srce za djecu oboljelu od raka".

Shodno navedenoj Odluci, sredstva u iznosu od 50.000,00 KM uplaćena su Udruženju.

### **Zavod za transfuzijsku medicinu F BiH**

Ugovorom o realizaciji odobrenih sredstava iz Budžeta Grada Sarajeva za 2021. godinu, potpisanim između Grada Sarajeva i Zavoda za transfuzijsku medicinu F BiH u novembru 2021. godine, sredstva u iznosu od 12.800,00 KM utrošena su za nabavku vozila za prijevoz dobrovoljnih darivalaca krvi i krvnih produkata za pacijente.

Naime, dio novca od prodaje službenog vozila Grada Sarajevo usmjeren je Zavodu za transfuzijsku medicinu FBiH u svrhu nabavke namjenskog vozila za potrebe Zavoda.

Na ovaj način postigao se pravi smisao prodaje službenog vozila Grada Sarajevo, jer se, umjesto korištenja vozila za potrebe administracije, taj novac iskoristio za kupovinu vozila koje će biti u službi zdravlja stanovnika Sarajeva i spašavanja života.

Procedura nabavke vozila okončana je u februaru 2022. godine, a Zavod za transfuzijsku medicinu F BiH dostavio je izvještaj o pravdanju dodijeljenih sredstava.

Na vozilu je apliciran grb Grada Sarajeva.

### **Priprema aplikacije za projekat Izvođenje čistih prostorija – tzv. Čista soba – Zavod za transfuzijsku medicinu F BiH**

Služba za lokalno poslovanje od decembra 2021. godine koordinirala je aktivnosti na pripremi aplikacije za grant sredstva u okviru programa *Temeljni Grant pomoći za projekte ljudske sigurnosti GAGP* Ambasade Japana u BiH.

U saradnji s Odsjekom za pripremu projekata Službe za lokalno poslovanje i razvoj grada, aplikacija za projekat Izvođenje čistih prostorija – tzv. Čista soba u objektu Zavoda za transfuzijsku medicinu FBiH predata je 25.02.2022. godine.

Projektom je predviđena rekonstrukcija postojećeg prostora u okviru Zavoda u svrhu adekvatne standardizacije, klasifikacije čistog prostora, kontrola i nadzor sigurnosnog pristupa u Banci tkiva, te unaprjeđenje kvalitete, sigurnosti i ocjene krajnjeg produkta – autolognih matičnih ćelija.

Zavod za transfuzijsku medicinu Federacije Bosne i Hercegovine zdravstvena je ustanova koja obavlja transfuzijsku djelatnost od 1958. godine u kontinuitetu, na teritoriji Kantona Sarajevo i Federacije Bosne i Hercegovine u skladu sa Zakonom o krvi i krvnim sastojcima i Zakonom o zdravstvenoj zaštiti, propisima donesenim na osnovu ovih zakona, kao i drugim propisima u zdravstvu. Djelatnost Zavoda je polivalentna i odvija se 365 dana u godini, 24/7.

Zavod pruža usluge i produkte za sve pacijente s teritorije Kantona Sarajevo, kao jedina ustanova tog tipa u Kantonu Sarajevo.

Također, Zavod pruža usluge i produkte za sve pacijente koji se liječe u KCUS-u, Općoj bolnici Prim. dr. Abdulah Nakaš, te usluge za pacijente koje upućuje JU Dom zdravlja KS i Zavod za zaštitu zdravlja i materinstva KS.

Također, 19.05.2022. godine održan je sastanak predstavnika Grada Sarajeva – Služba za lokalno poslovanje i Zavoda s direktoricom Qatar Charity na kojem je prezentiran projekat tzv. Čiste sobe. Na sastanku je dogovoreno da Zavod pripremi prezentaciju projekta za Qatar Charity, što je i učinjeno uz tehničku podršku Službe za lokalno poslovanje Grada Sarajeva.

Pripremljena prezentacija dostavljena je Qatar Charity s molbom za finansijsku podršku. Zahtjev je uzet u razmatranje.

### **Realizacija Sporazuma o zajedničkoj saradnji na dodjeli novčanih sredstava OJ Dom zdravlja Novo Sarajevo**

Sporazum o zajedničkoj saradnji na dodjeli novčanih sredstava OJ Dom zdravlja Novo Sarajevo (Omer Maslić) potpisan je 20.05.2020. godine između Grada Sarajeva, Grada Friedrichshafena i JU Dom zdravlja Kantona Sarajevo.

Sporazumom je definirana dodjela novčanih sredstava od strane pobratimskog Grada Friedrichshafena Domu zdravlja Novo Sarajevo radi nabavke hitne medicinske opreme neophodne za liječenje i sprječavanje širenja zarazne bolesti uzrokovane korona virusom (Covid-19).

Grad Friedrichshafen uplatio je sredstva u iznosu od 5.000,00€ na račun Grada Sarajeva u julu 2020. godine.

Grad Sarajevo nije prosljedio sredstva Domu zdravlja Novo Sarajevo u 2020. godini u svrhu nabavke medicinske opreme neophodne za liječenje i sprječavanje širenja bolesti uzrokovane koronavirusom (Covid-19).

Po saznanju da donatorska sredstva nisu uplaćena Domu zdravlja Novo Sarajevo, uplata navedenih sredstava izvršena je u martu 2022. godine.

### **SOS Dječije selo Sarajevo**

#### ***Ugovor o realizaciji sredstava***

Ugovor o realizaciji sredstava u iznosu od 32.000,00 KM iz Budžeta Grada Sarajeva za 2022. godinu, za finansiranje jedne porodične kuće u SOS Dječijem selu Sarajevo, odnosno jedne porodice, potpisan je 19.04.2022. godine.

Ugovor su potpisale gradonačelnica Sarajeva Benjamina Karić i nacionalna direktorica SOS – KINDERDORF INTERNATIONAL Mirela Gruenther Đečević.

Grad Sarajevo tradicionalno pruža podršku radu organizacije SOS Dječja sela BiH koja brine o djeci i mladima koji su ostali bez roditeljskog staranja.

SOS Dječija sela BiH djeluju u BiH od 1994. godine i dio su SOS Children's Villages International, internacionalne organizacija koja više od 70 godina djeluje u 136 zemalja širom svijeta, na svih 5 kontinenata.

SOS Dječija sela BiH pružaju jedinstven oblike brige za djecu bez roditeljskog staranja. Djeca zajedno sa SOS roditeljima, braćom i sestrama odrastaju u SOS porodici. Porodične veze razvijaju se na prirodan način, što znači da djevojčice i dječaci različite dobi žive zajedno kao braća i sestre, a biološka braća i sestre uvijek odrastaju u istoj SOS porodici.

SOS roditelj živi sa djecom, pruža im emocionalnu sigurnost te mogućnost da razvijaju nove i trajne veze unutar SOS porodice. SOS roditelj je stručno osposobljen da vodi brigu o djeci, ali istovremeno saraduje s drugim uposlenicima kako bi zajedno zadovoljili sve razvojne potrebe djece. Prihvatiti dijete kao svoje i s njime zajednički živjeti nezaobilazan je, neophodan, ali ponekad i zahtjevan dio života u SOS Dječijem selu. Upravo zbog toga su SOS roditelji osnovna i najbitnija karika u brizi o djeci.

### ***Prijem predstavnika SOS – KINDERDORF INTERNATIONAL***

Zamjenik gradonačelnice Sarajeva Haris Bašić održao je 02.06.2022. godine sastanak s predstavnicima SOS – KINDERDORF INTERNATIONAL Zdenkom Sedlarom, SOS CVI Representative, Mirelom Gruenther Đečević, nacionalna direktorica SOS International i Malik Garibija, Nacionalni direktor razvoja programa.

Na sastanku se razgovaralo o novim programima koji se osmišljavaju za Dječija sela Bosne i Hercegovine, u Gračanici i Sarajevu, s ciljem postizanja samoodrživosti sela. S tim u vezi predložili su da Grad Sarajevo pokrene proceduru za donošenje odluke o sticanju statusa SOS Dječija sela BiH od posebnog značaja za Grad Sarajevo.

Također su zamolili podršku Grada Sarajeva projektima kojima se osigurava integracija štíćenika u zajednicu kroz projekte praktične obuke sticanja znanja i vještina za privređivanje i samostalan život nakon napuštanja sela.

Država učestvuje s 10% u radu SOS dječiji sela BiH. Projekti koje realizira SOS dječija sela u BiH usklađeni su sa međunarodnim standardima koji važe u ovoj oblasti.

Naglašen je značaj društveno odgovornih firmi koje doniraju novac za rad sela, ali i daju edukaciju štíćenicima u ovladavanju praktičnim poslovnim vještinama.

### ***Odluka o sticanju statusa udruženja od posebnog značaja za Grad Sarajevo za SOS – KINDERDORF INTERNATIONAL***

Gradsko vijeće Grada Sarajeva donijelo je Odluku o sticanju statusa udruženja od posebnog značaja za Grad Sarajevo za SOS – KINDERDORF INTERNATIONAL („Službene novine Kantona Sarajevo“, broj 31/22).

Ovom odlukom Udruženje SOS – KINDERDORF INTERNATIONAL finansira se iz Budžeta Grada Sarajeva iznosom od 32.000,00 KM, uz mogućnost korekcije navedenog iznosa u narednim budžetskim godinama, a sve u skladu s rastom troškova života i objektivnim mogućnostima budžeta Grada Sarajeva.

## ***Sastanak s predstavnicima SOS – KINDERDORF INTERNATIONAL***

Pomoćnik gradonačelnice za lokalno poslovanje održao je 14.07.2022. godine sastanak s predstavnicima SOS – KINDERDORF INTERNATIONAL, KJKP „Vodovod i kanalizacija“, Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo i Općine Novi Grad Sarajevo.

Na sastanku se razgovaralo o mogućnostima iznalaženja rješenja o finansiranju i implementaciji zamjene vodovodne mreže u Dječijem selu Sarajevo, koja je dotrajala i stara, što dovodi do velikih gubitaka vode i visokih računa.

Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo izrazilo je spremnost da učestvuje u rekonstrukciji vodovodne mreže. Općina Novi Grad Sarajevo planira finansirati jednu trećinu troškova koji su procijenjeni na cca. 100.000,00 KM. Svoje učešće kroz besplatne vodomjere i ugradnju dalo bi KJKP „Vodovod i kanalizacija“.

Općina Novi Grad Sarajevo izrazila je spremnost da implementira ovaj projekat nakon što se potpiše sporazum između subjekata koji će participirati u realizaciji ovog projekta. S tim u vezi, Ministarstvo komunalne privrede infrastrukture, prostornog uređenja, građenja i zaštite okoliša KS uradilo je prijedlog Sporazuma.

Na 19. sjednici Gradskog vijeća Grada Sarajeva, održanoj 05.10.2022. godine, usvojena je inicijativa sljedećeg sadržaja: *Potrebno je da Grad Sarajevo, iz Budžeta Grada Sarajeva za 2022. godinu, osigura 30.000,00 KM za sufinansiranje rekonstrukcije vodovodne mreže koju koristi SOS Dječije selo Sarajevo – Općina Novi Grad.*

## **Savez distrofičara F BiH**

Ugovor o realizaciji sredstva u iznosu od 10.000,00 KM iz Budžeta Grada Sarajeva za 2022. godinu, potpisan je 19.04.2022. godine.

Ugovor su potpisali gradonačelnica Sarajeva Benjamina Karić i direktor Saveza distrofičara F BiH Almir Šahmanija.

Sredstva definirana Ugovorom dodijeljena su za redovne programske aktivnosti Udruženja – nabavku pomagala, rezervnih dijelova za elektromotorna kolica, te servisiranje i popravak kolica članovima Saveza potrebnih za kretanje i obavljanje svakodnevnih aktivnosti, a kako bi se smanjila potreba za konstantnim prisustvom ličnog pratioca.

Prvi put iz Budžeta Grada Sarajeva dodijeljena su sredstva Savezu distrofičara F BiH

Radi težine problema i nerazumijevanja okoline i društva, 1965. godine od strane grupe roditelja i prijatelja djece oboljele od progresivnog neuro-mišićnog oboljenja – distrofije bili su prisiljeni da osnuju udruženje kako bi udruženi i zajedničkim naporima djelovali prema zakonodavcu, široj društvenoj zajednici i tako ostvarili prava koja bi im omogućavala život dostojan čovjeka.

Savez distrofičara FBIH čini 6 članica – 6 kantonalnih udruženja iz Unsko-sanskog kantona, Hercegovačko-neretvanskog kantona, Bosansko-podrinjskog kantona, Tuzlanskog kantona, Zeničko-dobojskog kantona i Kantona Sarajevo.

Savez je nevladina, vanstranačka, društvena, dobrovoljna organizacija koja, na bazi solidarnosti građana i šire društvene zajednice, radi na unaprjeđenju borbe protiv nervno-mišićnih oboljenja.

Na području F BiH ima registrovanih 1178 članova uključenih u Savez putem spomenutih kantonalnih udruženja.

Savez se susreće s preko 40-ak neuro-mišićnih oboljenja. U gotovo svim slučajevima ne postoji lijek, niti adekvatni tretmani i nije poznat način na koji bi bilo moguće zaustaviti napredovanje ovih oboljenja.

Djelovanje Saveza distrofičara F BiH zasniva se na obezbjeđivanju određenih beneficija i pružanje pomoći, naročito oko uklanjanja arhitektonskih barijera, nabavke ortopedskih pomagala (elektromotornih kolica i rezervnih dijelova), lijekova, medicinske, profesionalne i socijalne rehabilitacije, pružanju pomoći članovima pri zapošljavanju u otvorenim sredinama, obrazovanju u skladu sa zakonom, praćenju, iniciranju i učešću u pokretanju i provođenju aktivnosti na ranom otkriću oboljenja, dijagnostici, prevenciji i tretmanu mišićnih i neuro-mišićnih oboljenja, praćenju i predlaganju izmjena i dopuna zakonske regulative u korist oboljelih, kao i provođenje drugih zadataka za koje se članice dogovore.

### **Udruženje osoba oboljelih od celijakije „No gluten“ Kantona Sarajevo**

Ugovor o realizaciji sredstava u iznosu od 5.000,00 KM iz Budžeta Grada Sarajeva za 2022. godinu potpisan je 24.04.2022. godine.

Ugovor su potpisali gradonačelnica Sarajeva Benjamina Karić i potpredsjednica Udruženja „No gluten“ Kantona Sarajevo, Muhiba Adanalić.

Sredstva definirana Ugovorom dodijeljena su za nabavku i podjelu bezglutenskih namirnica članovima Udruženja. Sredstva su na molbu Udruženja uplaćena u mjesecu maju 2022. godine, kako bi se svim članovima Udruženja na vrijeme podijelili paketi iz ove donacije te obilježio Međunarodni dan oboljelih od celijakije, kao i mjesec maj – mjesec svjesnosti o bolesti celijakije i drugih oblika nepodnošljivosti glutena.

Ciljevi i djelatnosti Udruženja su: unaprjeđenje i zaštita zdravlja i prava osoba oboljelih od celijakije, promoviranje i podizanje svijesti o celijakiji, alergiji i intoleranciji na gluten, ostvarivanje i provođenje prava oboljelih i članova njihovih obitelji, poboljšanje položaja i kvalitete života oboljelih i članova njihovih obitelji, promoviranje zdrave i uravnotežene striktno bezglutenske prehrane, širenje relevantnih podataka i informacija u vezi sa striktnom bezglutenskom prehranom, te najnovijih znanstvenih saznanja iz tog područja. Udruženje sudjeluje na domaćim i međunarodnim skupovima, seminarima, sajmovima i sl., koji su u vezi s ciljevima i djelatnostima Udruženja.

Na poziv Udruženja „No gluten“ Kantona Sarajevo, predstavnice Službe za lokalno poslovanje prisustvovala su otvorenju novoopremljenih prostorija Udruženja osoba oboljelih od celijakije „No gluten“, 30.03.2022. godine.

### **JU Centar za odgoj, obrazovanje i rehabilitaciju „Vladimir Nazor“**

Ugovor o realizaciji sredstava u iznosu od 5.000,00 KM iz Budžeta Grada Sarajeva za 2022. godinu potpisan je 20.06.2022. godine.

Ugovor su potpisale gradonačelnica Sarajeva Benjamina Karić i direktorica JU Centar za odgoj, obrazovanje i rehabilitaciju „Vladimir Nazor“, Maida Idrizović.

Sredstva definirana Ugovorom dodijeljena su za opremanje kuhinje JU Centar za odgoj obrazovanje i rehabilitaciju „Vladimir Nazor“.



Ustanova je u stalnom procesu transformacije zbog neiscrpane težnje da se razvijaju talent, vještine i spoznaja kod djece i učenika. Kontinuirano se podiže kvalitet odgojno-obrazovanog rada primjenom savremenih metoda i rehabilitacijskim terapijskim sadržajima koji se njeguju i proširuju dugi niz godina.

Također, 08.06.2022. godine, djeca su posjetila Vijećnicu u kojoj je upriličen prijem za djecu s razvojnim teškoćama iz Predškolskog odjela „More nade”.

### **Udruženje porodica s troje i više djece „Porodice tri plus”**

Ugovor o realizaciji sredstava u iznosu od 5.000,00 KM iz Budžeta Grada Sarajeva za 2022. godinu potpisan je 20.06.2022. godine.

Ugovor su potpisali gradonačelnica Sarajeva Benamina Karić i predsjednik Udruženja porodica sa troje i više djece „Porodice tri plus”, Mustafa Vlahovljak.

Sredstva definirana Ugovorom dodijeljena su za realizaciju Projekta „Porodična tri plus kartica”. Projektom „Porodična 3 plus kartica“, porodice s troje i više djece uz karticu ostvaruju razne pogodnosti u privrednom i sportskom sektoru.

Udruženje radi na podizanju kvaliteta života, kao i osnaživanju integriteta višečlanih porodica. Njihova misija je doprinosti zakonskom zagovaranju sistemskog obezbjeđivanja javnih i društvenih prava i benefita za ove porodice, u svrhu ostvarenja boljeg ambijenta za njihove društvene, finansijske, odgojno-obrazovne, sportsko-kulturne, poslovne i sve ostale životne prilike.

### **Udruženje „Think Pink/Zajedno smo jedno”**

Ugovor o realizaciji sredstava u iznosu od 10.000,00 KM iz Budžeta Grada Sarajeva za 2022. godinu, potpisan je 20.06.2022. godine.

Ugovor su potpisale su gradonačelnica Sarajeva Benamina Karić i izvršna direktorica Udruženja *Zajedno smo jedno*, Nermina Hasić.

Sredstva definirana Ugovorom dodijeljena su za redovni rad Udruženja, organizaciju utrke Race for the Cure, aktivnosti organizovanja besplatnih mamografskih pregleda za žene u potrebi, pripremu i uručivanje paketića prve pomoći za svaku novooperisanu ženu od karcinoma dojke u Bosni i Hercegovini, te pružanje psihosocijalne podrške ženama suočenim s bolešću.

Organizacija „Think Pink/Zajedno smo jedno” je jedna od najuspješnijih organizacija u Bosni i Hercegovini koja se bavi osnaživanjem zdravlja žena i pružanja podrške osobama koje se bore s karcinomom dojke u našoj državi kroz različite aktivnosti i rad na terenu.

Najvidljivija aktivnost Udruženja je „Race for the cure – Trka/Šetnja za ozdravljenje” koja se održava u više od 150 svjetskih gradova, gdje svake godine za unaprijeđenje zdravlja žena šeta/trči nekoliko miliona ljudi. Veliki javni događaj za žensko zdravlje održan je u Sarajevu 25.09.2022. godine s mnoštvom inovativnih sadržaja i nekoliko hiljada građanki i građana iz cijele Bosne i Hercegovine koji su ujedinjeno pružili podršku ženama oboljelim od karcinoma dojke i zajedno slavili život.

Grad Sarajevo tradicionalno pruža svoj doprinos manifestaciji „Race for the cure – Trka/Šetnja za ozdravljenje” registracijom „Gradonačelnicinog tima“, te je i na taj način pružena podrška koja ima za cilj osnaživanje zdravlja i podizanje svijesti žena u borbi protiv karcinoma dojke.

### **Udruženje humanista „Alden S.46“**

Ugovor o realizaciji sredstava u iznosu od 2.000,00 KM iz Budžeta Grada Sarajeva za 2022. godinu potpisan je 06.07.2022. godine.

Ugovor su potpisale gradonačelnica Sarajeva Benjamina Karić i predsjednica Skupštine Udruženja humanista „Alden S.46“, Dženita Salispahić.

Sredstva definirana Ugovorom dodijeljena su za finansiranje rada Dječije kuhinje Kantona Sarajevo.

Udruženje humanista „Alden S.46“ kako bi sačuvalo sjećanje na jednog mladog čovjeka, velikog humanistu, pokrenulo je priču Prve dječije kuhinje. Kuhinja trenutno ima 53 korisnika (djece sa poteškoćama u razvoju, djece u socijalnoj potrebi i djece samohranih roditelja – majki). U sklopu Udruženja postoji i edukacioni centar.

Ciljevi udruženja su iniciranje i omogućavanje edukacije novih i postojećih članova udruženja koji će se baviti izradom različitih vrsta projekata (stručni, istraživački i dr..) iz oblasti socijalne zaštite, obrazovanja, zdravstva, nauke, kulture, kao i saradnja sa različitim edukativnim i istraživačkim projektima, kako onim iz BiH tako i onima van granica BiH.

### **Centar za promociju i unaprjeđenje zdravlja „Generacija“**

Grad Sarajevo pokazuje posebnu empatiju prema starijim osobama i njihovim potrebama, a tome ide u prilog činjenica da je Grad Sarajevo uspostavio saradnju sa Centrom za promociju i unaprjeđenje zdravlja „Generacija“.

Gradonačelnica je prilikom posjete Centru za promociju i unaprjeđenje zdravlja „Generacija“, 31.12.2021. godine, uputila poziv korisnicima Centra za prijem u Vijećnici. Prijem za korisnike Centra za promociju i unaprjeđenje zdravlja „Generacija“, održan je 10.03.2022. godine. Prijemu u Vijećnici prisustvovali su i predstavnici Udruženja zajedno s predsjednikom Mahirom Selmanovićem.

Godišnjica rada Udruženja „Generacija“ održana je 21.06.2022. godine u Vijećnici. Obilježavanju godišnjice prisustvovala je gradonačelnica Sarajeva Benjamina Karić.

Misija Centra za promociju i unaprjeđenje zdravlja „Generacija“ je promocija, unaprjeđenje i popularizacija zdravlja i aktivnog životnog stila među osobama treće životne dobi, djece i mladih. Cilj rada bazira im se na unaprjeđenju zdravlja jednog generacijskog niza kroz različite zdravstvene programe, unaprjeđenje kvalitete života i aktivnog uključenja starijih osoba u zajednicu, odgađanje ili prevencija institucionalnog smještaja u ustanove za starije osobe, te promocija partnerstva s porodicama, zdravstvenim i socijalnim radnicima u promociji zdravlja starijih osoba u zajednici.

Centar za promociju i unaprjeđenje zdravlja „Generacija“ djeluje na temeljima dugogodišnjeg iskustva u treningu, edukaciji, promociji i implementaciji brojnih projekata u sektoru javnog zdravstva i povezanih sektora, kao i dugogodišnjeg iskustva rada sa brojnim stranim i domaćim partnerima.

Udruženje „Generacija“ već 5 godina uspješno vodi prvi i jedini centar zdravstvenog karaktera za sve generacijske skupine, s fokusom na treću starosnu dob kao skupinu najugroženije generacije. Na području Općine Stari Grad, koji ima 976 upisanih članova iz svih općina Kantona Sarajevo, ujedno je i prvi zdravstveni servis koji otvara vrata svim općinama KS.

### **Udruženje „Naša djeca” Sarajevo**

Na poziv Udruženja „Naša djeca“ Sarajevo, predstavnica Službe za lokalno poslovanje Grada Sarajeva prisustvovala je prezentaciji na temu „Djeca s poteškoćama u razvoju“ 27.4.2022. godine.

Kako su djeca najosjetljivija kategorija našeg grada i kao takva briga su svih nas, Prijem predsjednice Dječijeg parlamenta općine Novi Grad Sarajevo, Sajre Kusture, organizovan je sa zamjenicom gradonačelnice Anjom Margetić 27.06.2022. godine.

Razmotrena je saradnja u vidu podrške Grada Sarajeva nekim od projekata koje ovo udruženje planira provesti u budućnosti u cilju ostvarivanja i poštivanja prava djece i mladih.

Udruženje „Naša djeca” Sarajevo dugi niz godina bavi se zaštitom prava djece shodno UN Konvenciji o pravima djeteta, dajući akcenat na skupinu tzv. participativnih prava koje čine okvir za ostvarivanje prava djeteta na sudjelovanje.

Značaj njihovog dosadašnjeg rada je realizacija projekata u kojima su direktno uključena djeca, kao što su: debatni klubovi, istraživačke grupe, učešće u izradi Izvještaja o stanju prava djece u BiH, učešće Dječijeg parlamenta u izradi Akcionog plana za djecu Općine Novi Grad Sarajevo i mnogo drugih aktivnosti u cilju promocije dječije participacije.

### **Prijem predstavnika Udruženja osoba s cerebralnom paralizom Kantona Sarajevo**

Stvaranje ambijenta u kojem će svi imati jednake mogućnosti, bez obzira na različite sposobnosti, uklanjanje barijera s kojima se svakodnevno susreću i najvažnije, podizanje svijesti ljudi, jedan je od motiva prijema predsjednika Udruženja osoba s cerebralnom paralizom KS, Nevenkom Novotnijem, koji je organizovan sa zamjenicom gradonačelnice Grada Sarajeva Anjom Margetić, 24.06.2022. godine.

Udruženje osoba s cerebralnom paralizom KS okuplja jednu od najtežih kategorija osoba s poteškoćama u razvoju. Bolest nastaje za vrijeme trudnoće, u toku poroda ili neposredno nakon poroda. Osobe s cerebralnom dječijom paralizom većinom su osobe s kombinovanim smetnjama, s intelektualnim, motornim i senzornim onesposobljenjima. Neophodni su individualni programi i multidisciplinarni pristup u radu uz tijesnu saradnju sa cjelokupnom obitelji, posebno sa roditeljima djece i adolescenata sa cerebralnom dječijom paralizom. Udruženje trenutno brine o interesima 311 članova.

Poboljšanja oboljelih od cerebralne paralize u ranom djetinjstvu su moguća nakon konstantnih fizikalnih vježbi ili operativnih zahvata. S tim u vezi, projekat fizikalne terapije – kućne fizikalne terapije, predstavlja fokus njihov interesovanja koji ima za cilj sprječavanje težeg stepena onesposobljavanja djece i odraslih sa cerebralnom dječijom paralizom. Projektom bi bili angažovani fizijatri koji bi vršili preglede direktno u domovima članova koji bi davali preporuke individualnih vježbi za svakog posebno, a koji bi dolazili dva puta sedmično u period od dva mjeseca. Pored navedenih aktivnosti, projekat podrazumijeva i niz drugih aktivnosti koji imaju za cilj sprječavanje težeg stepena onesposobljavanja odraslih sa cerebralnom paralizom, kojih je ukupno 36.

## Savez udruženja osoba s cerebralnom paralizom Federacije BiH

Predstavnice Službe za lokalno poslovanje prisustvovala su prezentaciji projekata udruženja članica Saveza udruženja osoba s cerebralnom paralizom Federacije BiH, 25.03.2022. godine.

Misija Saveza udruženja osoba s cerebralnom paralizom FBiH je: podsticanje mjera za unaprjeđivanje socijalne i zdravstvene zaštite, odgoja, obrazovanja, rehabilitacije, osposobljavanja, zapošljavanja i društvenog života osoba s cerebralnom paralizom, podsticanje i provođenje mjera socijalne re/habilitacije, psihološke podrške, psihosocijalnog tretmana, socijalno-pedagoške podrške, pomoći pri socijalnom uključivanju. Savez udruženja osoba s cerebralnom paralizom F BiH je članica Vijeća organizacija osoba sa invaliditetom Federacije BiH (VOOSI).

Savez trenutno ima 4 članice i brine o interesima oko 500 članova u četiri kantona:

- Udruženje oboljelih od cerebralne dječije paralize Kantona Sarajevo,
- Udruženje oboljelih od dječije cerebralne paralize i distrofije Bosansko-podrinjskog Kantona Goražde,
- Kantonalno udruženje roditelja osoba oboljelih od cerebralne paralize i drugih onesposobljenja „Dlan” (Zeničko-dobojski kanton),
- Udruženje osoba s cerebralnom paralizom i drugim onesposobljenjima Sapna (Tuzlanski kanton)

### III Tabelarni pregled dodijeljenih sredstava iz Budžeta Grada Sarajeva za 2022. godinu iz iz oblasti saradnje sa zdravstvenim ustanovama i organizacijama porodične i dječije zaštite

R.b.	Naziv udruženja	Odobreni iznos (KM)
1.	Udruženje Srce za djecu oboljelu od raka	20.000,00
2.	Udruženje oboljelih od Morbus Chrona i ulceroznog colitisa	10.000,00
3.	Humanitarna organizacija SOS Dječija sela	32.000,00
4.	Savez distrofičara F BiH	10.000,00
5.	Udruženje osoba oboljelih od celijakije „No gluten“ Kantona Sarajevo	5.000,00
6.	JU Centar za odgoj, obrazovanje i rehabilitaciju „Vladimir Nazor”	5.000,00
7.	Udruženje porodica s troje i više djece „Porodice tri plus”	5.000,00
8.	Udruženje „Think Pink/Zajedno smo jedno“	10.000,00
9.	Udruženje humanista „Alden S.46“	2.000,00